

摘藻堂四庫全書薈要

史部

欽定四庫全書薈要卷六千五百九十九

史部

明史卷六

大學士張廷玉等奉 敕修

本紀第六

成祖二

永樂元年春正月己卯朔御奉天殿受朝賀宴羣臣及屬國使乙酉享太廟辛卯大祀天地於南郊復周王橚齊王榑代王桂岷王梗舊封以北平為北京癸巳保定

侯孟善鎮遼東丁酉宋晟為平羌將軍鎮甘肅二月庚戌
設北京留守行後軍都督府行部國子監改北平曰順天
府乙卯遣御史分巡天下為定制己未徙封寧王權於南
昌貽書郭勒齊汗許其遣使通好癸亥耕藉田乙丑遣使
徵尚師哈立麻於烏斯藏己巳振北京六府饑辛未命法
司五日一引奏罪囚壬申瘞戰地暴骨甲戌高陽王高煦
備邊開平三月庚辰江陰侯吳高鎮大同壬午改北平行
都司為大寧都司徒保定始以大寧地畀烏梁海戊子平

江伯陳瑄都督僉事宣信充總兵官督海運餉遼東北京
歲以為常甲午振直隸北京山東河南饑夏四月丁未朔
安南胡奎乞襲陳氏封爵遣使察實以聞己酉戶部尚書
夏原吉治蘇松嘉湖水患辛未岷王梗有罪降其官屬甲
戌襄城伯李濬鎮江西五月丁丑除天下荒田未墾者額
稅癸未宥死罪以下遞減一等庚寅捕山東蝗丁酉河南
蝗免今年夏稅是月再論靖難功封駙馬都尉袁容等三
人為侯陳亨子懋等六人為伯六月壬子代王桂有罪削

其護衛癸丑遣給事中御史分行天下撫安軍民有司奸
貪者逮治丁巳改上高皇帝高皇后尊諡戊辰武安侯鄭
亨鎮宣府秋七月庚寅復貽書郭勒齊八月己巳發流民
以下墾北京田甲戌徙直隸蘇州等十郡浙江等九省富
民實北京九月癸未命寶源局鑄農器給山東被兵窮民
庚寅初遣中官馬彬使爪哇諸國乙未奪厯城侯盛庸
爵尋自殺庚子岷王梗有罪削其護衛冬十一月乙亥
朔頒厯於朝鮮諸國著為令壬辰罷遣浚河民夫甲午

北京地震乙未命六科辦事官言事丙申韓觀討柳州
山賊平之閏月丁卯封胡奎為安南國王是年始命內
臣出鎮及監京營軍朝鮮入貢者六自是歲時貢賀為
常琉球中山山北山南暹羅占城爪哇西王日本刺泥
安南入貢

二年春正月乙卯大祀天地于南郊己巳召世子高熾
及高陽王高煦還京師三月乙巳賜曾蔡等進士及第
出身有差己酉始選進士為翰林院庶吉士庚戌吏部

請罪千戶違制薦士者帝曰馬周不因常何進乎果才
授之官否則罷之可耳戊辰改封敷惠王允熙甌寧王
奉懿文太子祀夏四月辛未朔置東宮官屬壬申僧道
行為太子少師復其姓姚賜名廣孝甲戌立子高熾為
皇太子封高煦漢王高燧趙王壬午封汪應祖為琉球
國山南王五月壬寅豐城侯李彬鎮廣東清遠伯王友
克總兵官率舟師巡海六月丁亥汰冗官辛卯振松江
嘉興蘇州湖州饑甲午封哈密恩克特穆爾為忠順王

秋七月壬戌鄱陽氏進書毀先賢杖之毀其書丙寅振
江西湖廣水災八月丁酉故安南國王陳日烜弟天平
來奔九月丙午周王橐來朝獻騶虞百官請賀帝曰瑞
應依德而至騶虞若果為祥在朕更當修省丁卯徙山
西民萬戶實北京命自今御史巡行察吏毋得撫拾人
言賢否皆具實蹟以聞冬十月丁丑河決開封乙酉蒲
城河津黃河清是月籍長興侯耿炳文家炳文自殺十
一月甲辰御奉天門錄囚癸丑京師及濟南開封地震

敕羣臣修省戊午蠲蘇松嘉湖杭水災田租十二月壬辰同州韓城黃河清是月下李景隆於獄是年占城巴什伯里疏球山北山南爪哇真臘入貢暹羅日本琉球中山入貢者再

三年春正月庚戌大祀天地于南郊甲寅遣使責諭安南庚申復免順天永平保定田租二年二月己巳行部尚書雋僉以言事涉怨誹誅癸未趙王高燧居守北京三月甲寅免湖廣被水田租夏六月己卯中官鄭和帥

舟師使西洋諸國庚辰中官山壽等帥兵出雲州覲敵
甲申夏原吉等振蘇松嘉湖饑免天下農民戶口食鹽
鈔庚寅胡奎謝罪請迎陳天平歸國秋九月丁酉蠲蘇
松嘉湖水災田租凡三百三十八萬石丁巳徙山西民
萬戶實北京冬十月盜殺駙馬都尉梅殷丁卯齊王樽
有罪三賜書戒之戊子頒祖訓於諸王十二月戊辰沐
晟討八百降之庚辰都督僉事黃中呂毅以兵納陳天
平於安南是年蘇門答刺滿刺加古里淳泥來貢封其

長為王日本貢馬并俘獲倭寇為邊患者爪哇東西占
城磔里日羅夏治合貓里火州回回入貢暹羅琉球山
南山北入貢者再琉球中山入貢者三

四年春正月丁未大祀天地於南郊丙辰初御午朝今
羣臣奏事得從容陳論三月辛卯朔釋奠於先師孔子
甲午設遼東開原廣寧馬市乙巳賜林環等進士及第
出身有差丙午胡奎襲殺陳天平於芹站前大理卿薛
嵩死之黃中等引兵還夏四月己卯遣使購遺書五月

丁酉振常州廬州安慶饑庚戌齊王搏有罪削官屬護
衛留之京師六月己未朔日當食陰雲不見禮官請表
賀不許丙寅南陽獻瑞麥諭禮部曰比郡縣屢奏祥瑞
獨此為豐年之兆命薦之宗廟秋七月辛卯朱能為征
夷將軍沐晟張輔副之帥師分道討安南兵部尚書劉
偽叅贊軍務行部尚書黃福大理卿陳洽督餉詔曰安
南皆朕赤子惟黎季犛父子首惡必誅他脅從者釋之
罪人既得立陳氏子孫賢者毋養亂毋玩寇毋毀廬墓

母害禾稼母攘財貨掠子女母殺降有一於此雖功不
宥乙巳申誹謗之禁閏月壬戌詔以明年三月建北京
宮殿分遣大臣採木於四川湖廣江西浙江山西八月
丁酉詔通政司凡上書奏民事者雖小必以聞癸丑齊
王搏廢為庶人九月戊辰振蘇松常杭嘉湖流民復業
者十二萬餘戶冬十月戊子成國公朱能卒于軍張輔
代領其衆乙未克隘留關庚子沐晟率師會于白鶴十
一月己巳甘露降孝陵松柏醴泉出神樂觀薦之太廟

賜百官十二月辛卯赦天下殊死以下張輔大破安南
兵於嘉林江丙申拔多邦城丁酉克其東都癸卯克西
都賊遁入海辛亥旤寧王允熙邸第火王薨是年暹羅
占城於闐淳泥日本琉球中山山南婆羅入貢爪哇東
西真臘入貢者再巴什伯里入貢者三琉球進閩人還
之回回結雅渠進玉梳却之

五年春正月丁卯大祀天地于南郊己巳張輔大敗安
南兵于木丸江二月庚寅出翰林學士解縉為廣西叅

議三月丁巳封尚師哈立麻為大寶法王辛巳張輔大
破安南兵於富良江夏四月巳酉振順天河間保定饑五
月甲子張輔擒黎季犛黎蒼獻京師安南平河南饑逮
治匿災有司救都察院凡災傷不以實聞者罪之六月
癸未以安南平詔天下置交趾布政司巳丑山陽民丁
珏訐其鄉人誹謗擢為刑科給事中甲午詔自永樂二
年六月後犯罪去官者悉宥之乙未張輔移師會韓觀
討潯柳蠻癸卯命張輔訪交趾人才禮遣赴京師秋七

月乙卯皇后崩丁卯河溢河南八月乙酉左都督何福鎮甘肅庚子錄囚雜犯死罪減等論戍流以下釋之九月壬子鄭和還乙卯御奉天門受安南俘大賚將士冬十月潯柳蠻平是年琉球中山山南婆羅日本巴什伯里阿魯賽瑪爾堪蘇門荅刺滿刺加小葛蘭入貢

六年春正月丁巳岷王梗復有罪罷其官屬辛酉大祀天地於南郊二月丁未除北京永樂五年以前逋賦免諸色課程三年三月癸丑寧陽伯陳懋鎮寧夏乙卯除

河南山東山西永樂五年以前逋賦夏四月丙申始命雲南鄉試五月壬戌夜京師地震六月庚辰詔罷北京諸司不急之務及買辦以甦民困流民來歸者復三年丁亥張輔沐晟還秋七月癸丑論平交趾功進封張輔英國公沐晟黔國公王友清遠侯封都督僉事柳升安遠伯餘爵賞有差八月乙酉交趾簡定反沐晟為征夷將軍討之劉儁仍叅贊軍務九月己酉命刑部疏滯獄癸卯鄭和復使西洋冬十一月丁巳錄囚十二月丁酉

沐晟及簡定戰於生厥江敗績劉雋及都督僉事呂毅
叅政劉昱死之是月劉升陳瑄李彬等率舟師分道沿
海捕倭是年郭勑齊為其下所弑立布尼雅錫哩為可
汗淳泥國王來朝衛拉特占城于闐暹羅賽瑪爾堪榜
葛刺馮加施闌日本爪哇琉球中山山南入貢

七年春正月癸丑賜百官上元節假十日著為令乙卯
大祀天地于南郊二月乙亥遣使於巡狩所經郡縣存
問高年八十以上賜酒肉九十加帛丙子徵致仕知府

劉彥才等九十二人分署府州縣辛巳以北巡告天地
宗廟社稷壬午發京師皇太子監國張輔王友率師討
簡定戊子謁鳳陽皇陵三月甲辰次東平州望祭泰山
辛亥次景州望祭恒山乙卯平安自殺壬戌至北京癸
亥大賚官吏軍民丙寅詔起兵時將士及北京効力人
民雜犯死罪咸宥之充軍者官復職軍民還籍伍壬申
柳升敗倭於青州海中救還師夏四月癸酉朔皇太子
攝享太廟壬午海寇犯欽州副總兵李珪遣將擊敗之

閏月戊申命皇太子所決庶務六科月一類奏丙辰諭
行在法司重罪必五覆奏五月己卯營山陵于昌平封
其山曰天壽乙未封衛拉特瑪哈木特為順寧王太平
為賢義王巴圖博囉為安樂王六月壬寅蔡北巡郡縣
長吏擢汶上知縣史誠祖治行第一下易州同知張騰
于獄辛亥給事中郭驥使布尼雅錫哩為所殺丁卯斥
御史洪秉等四人詔自今御史勿用吏員秋七月癸酉洪
國公邱福為征虜大將軍武成侯王聰同安侯火真副

之靖安侯王忠安平侯李遠為左右叅將討布尼雅錫
哩九月甲寅邱福敗績于臚胸河福及聰貞忠遠皆戰
死庚申邱福敗績於鹹子闕九月庚午朔日有食之張
輔敗賊於太平海口甲戌贈北征死事李遠莒國公王
聰漳國公遂決意親征丙子武安侯鄭享率師巡邊壬
午成安侯郭亮偹禦開平冬十月丁未削邱福封爵徙
其家于海南十一月戊寅張輔獲簡定于美良送京師
誅之十二月庚戌賜濟寧至良鄉民頻年遞運者田租一

年乙丑召張輔還是年滿剌加哈烈賽瑪爾堪火州古里占城蘇門答刺琉球中山山南入貢暹羅榜葛刺入貢者再

八年春正月辛未召寧陽侯陳懋隨任漢北已卯皇太子攝祀天地於南郊癸巳免去年楊州淮安鳳陽陳州水災田租贖軍民所鬻子女二月辛丑以北征詔天下命戶部尚書夏原吉輔皇長孫瞻基留守北京乙巳皇太子錄囚奏貫雜犯死罪以下從之丁未發北京癸亥

遣祭所過名山大川乙丑大閱三月丁卯清遠侯王友
督中軍安遠伯柳升副之寧遠侯何福武安侯鄭亨督
左右哨寧陽侯陳懋廣恩伯劉才督左右掖都督劉江
督前哨甲戌次鳴鑾戌乙亥誓師夏四月庚申次威虜
鎮以橐駝所載水給衛士視軍士皆食始進膳五月丁
卯更名臚朐河曰飲馬甲戌聞布尼雅錫哩西奔遂渡
飲馬河追之己卯及于鄂諾河大敗之布尼雅錫哩以
七騎遁丙戌還次飲馬河詔移師征阿魯台丁亥回回

哈喇瑪雅殺都指揮劉秉謙據肅州衛以叛千戶朱迪
等討平之六月甲辰阿魯台偽降命諸將嚴陣以待果
悉衆來犯帝自將精騎迎擊大敗之追北百餘里丁未
又敗之己酉班師秋七月丁卯次開平常在軍念士卒
艱苦每蔬食是日宴賚始復常膳西寧侯宋琥鎮甘肅
辛巳張安慶徽州鳳陽鎮江饑壬午至北京御奉天殿
受朝賀甲午論功行賞有差八月壬寅進封柳升安遠
侯乙卯何福自殺庚申河溢開封九月乙巳幸天壽山

冬十月丁酉發北京是月倭寇福州十一月甲戌至京
師十二月癸巳阿魯台遣使貢馬戊午陳季擴乞降以
為交趾右布政使季擴不受命是年碩尼堪寇黃河東
岸寧夏都指揮王倣敗沒淳泥呂宋馮嘉施蘭蘇門荅
刺榜葛刺入貢占城貢象琉球山南瓜哇暹羅貢馬琉
球中山入貢者三

九年春正月甲戌大祀天地于南郊丙子柳升鎮寧夏
已卯張輔為征虜副將軍會沐晟討交趾丙戌豐城侯

李彬平江伯陳瑄率浙江福建兵捕海寇二月辛亥陳瑛有罪下獄死丙辰詔赦交趾丁巳倭陷昌化千戶所己未工部尚書宋禮開會通河三月甲子賜蕭寺中等進士及第出身有差壬午浚祥符縣黃河故道戊子劉江鎮遼東夏六月乙巳鄭和還自西洋是月下交趾右叅議解縉於獄秋七月丙子張輔敗賊于月常江九月戊寅諭法司凡死罪必五覆奏壬午命屯田軍以公事妨農務者免徵子粒著為令冬十月乙未寬北京謫徙

軍民賦役癸卯封哈密推勒特穆爾為忠義王乙巳復
修太祖實錄十一月戊午蠲陝西逋賦癸亥張輔敗賊
於生厥江丁卯立皇長孫瞻基為皇太孫壬申韓觀為
征夷副將軍改鎮交趾都指揮葛森鎮廣西丙子敕法
司決遣罪囚毋淹滯是月遣使督廩戰場暴骨十二月
壬辰敕宥福餘朶顏泰寧三衛罪令入貢閏月丁巳命
府部諸臣陳軍民利弊是年浙江湖廣河陽順天楊州
水河南陝西疫遣使振之滿剌加王來朝爪哇榜葛刺

古里柯枝蘇門答刺阿魯彭亨急蘭丹南巫里暹羅入貢阿嚕台來貢馬巴什伯里獻文豹琉球中山入貢者三

十年春正月己丑命入覲官千五百餘人各陳民瘼不言者罪之言有不當勿問丁酉大祀天地於南郊癸丑振平陽饑逮治布政使及郡縣官不奏聞者二月辛酉蠲山西河南逋賦庚辰遼王植有罪削其護衛三月丁亥豐城侯李彬討甘肅叛寇巴爾斯多羅岱戊子賜馬

鐸等進士及第出身有差甲辰免北京水災租稅夏六月甲戌諭戶部凡郡縣有司及朝使目擊民艱不言者悉逮治秋七月癸卯禁中官干預有司政事八月癸丑張輔大破交趾賊於神投海己未敕邊將自長安嶺迤西迄洗馬林築石垣深濠塹冬十月戊辰獵城南武岡十一月壬午侍講楊榮經略甘肅丙辰鄭和復使西洋是年淳泥占城暹羅滿刺加榜葛刺蘇門答刺南淳利琉球山南入貢

十一年春正月辛巳朔日有食之詔罷朝賀宴會壬午
諭通政使禮科給事中凡朝覲官境內災傷不以聞為
他人所奏者罪之辛卯大祀天地於南郊辛丑豐城侯
李彬鎮甘肅召宋琥還二月辛亥始設貴州布政使癸
亥令北京民戶分養孳生馬著為令甲子幸北京皇太
孫從尚書蹇義學士黃淮諭德楊士奇洗馬楊溥輔皇
太子監國乙丑發京師命給事中御史所過存問高年
賜酒肉及帛丙寅英仁孝皇后於長陵辛未次鳳陽謁

皇陵夏四月己酉至北京五月丁未曹縣獻騶虞禮官
請賀不許秋七月戊寅封阿魯台為和寧王八月甲子
北京地震乙丑鎮遠侯顧成討思州靖州叛苗九月壬
午詔自今郡縣官每歲春行視境內蝗蝻害稼即捕絕
之不如詔者二司并罪冬十月丙寅以璽書命皇太子
錄囚十一月戊寅以野蠶繭為衾命皇太子薦太廟壬
午衛拉特瑪哈木特兵渡飲馬河阿魯台告警命邊將
嚴守備甲申寧陽侯陳懋都督潭青馬聚朱宗巡寧夏

大同山西邊簡練士馬尋命陝西山西及潼關等五衛
兵駐宣府中都遼東河南三都指揮使司及武平等四
衛兵會北京乙巳應城伯孫巖備開平十二月壬子張
輔沐晟大敗交趾賊於愛子江是年瑪哈木特弑其主
布尼雅錫哩立塔爾巴為可汗巴什伯里滿刺加占城爪
哇西王入貢琉球中山入貢者四琉球山南入貢者再

明史卷六

欽定四庫全書薈要卷六千六百

史部

明史卷七

大學士張廷玉等奉 敕修

本紀第三

成祖三

十二年春正月庚寅思州苗平辛丑發山東山西河南
及鳳陽淮安徐邳民十五萬運糧赴宣府二月己酉大
閱庚戌親征瓦剌安遠侯柳升領大營武安侯鄭亨領

中軍寧陽侯陳懋豐城侯李彬領左右哨成山侯王通
都督譚青領左右振都督劉江朱榮為前領庚申振鳳
翔隴州饑按長吏不言者罪三月癸未張輔俘陳季擴
于老撾以獻交趾平庚寅發北京皇太孫從夏四月甲
辰朔次興和大閱己酉頒軍中賞罰號令庚戌設傳令
紀功官丁卯次屯雲谷字羅不花等來降五月丁丑命
尚書光祿卿給事中為督陣官察將士用命不用命者
六月甲辰劉江遇瓦剌兵戰於康哈里孩敗之戊申次

忽蘭忽失溫馬哈木帥衆來犯大敗之追至土刺河馬
哈木宵遁庚戌班師宣捷於阿魯台戊午次三峯山阿
魯台遣使來朝己巳以敗瓦剌詔天下秋七月戊子次
紅橋詔六師入關有踐田禾取民畜產者以軍法論己
亥次沙河皇太子遣使來迎八月辛丑朔至北京御奉
天殿受朝賀丙午蠲北京州縣租二年戊午賞從征將
士九月癸未郭亮徐亨備開平丙戌靖州苗平申午費
獻鎮甘肅劉江鎮遼東閏月甲辰以太子遣使迎駕緩

徵侍讀黃淮侍講楊士奇正字金問及洗馬楊溥為善
下獄未幾釋士奇復職甲子召吳高還丁卯都督朱榮
鎮大同冬十一月甲辰錄囚庚戌廢晉王濟熺為庶人
庚申蠲蘇松杭嘉湖水災田租四十七萬九千餘石是
年泥八剌國沙的新葛來朝封為王彭亨烏斯藏入貢
真臘進金縷衣琉球中山王貢馬榜葛剌貢麒麟
十三年春正月丙午塞居庸以北隘口丁未馬哈木謝
罪請朝貢許之壬子北京午門災戊午敕內外諸司蠲

諸宿逋將士軍官犯罪者悉宥之二月癸酉遣指揮劉
斌給事中張磐等十二人巡視山西山東大同陝西甘
肅遼東軍操練屯政覈實以聞甲戌命行在禮部會試
天下貢士癸未張輔等師還戊子論平交趾功賞賚有
差三月己亥策士於北京賜陳循等進士及第出身有
差丙午廣西蠻叛指揮同知葛森討平之夏四月戊辰
張輔鎮交趾五月丁酉朔日有食之乙丑鑿清江浦通
北京漕運六月振北京河南山東水災秋七月癸卯鄭

和還乙巳四川戎縣山都掌蠻平八月庚辰振山東河
南北京順天府縣饑九月壬戌北京地震冬十月甲申
獵於近郊壬辰法司奏侵冒官糧者帝怒命戮之及覆
奏帝曰朕過矣仍論如律自今死罪者皆五覆奏著為
令十二月蠲順天蘇州鳳陽浙江湖廣湖南山東州縣
水旱田租是年琉球山南山北瓜哇西至占城古里柯
枝南潑利甘巴里滿刺加忽魯謨斯哈密哈烈撒馬兒
罕火州土魯番蘇門答刺俺都淮失刺思入貢麻林及

諸番進麟麟天馬神鹿琉球中山入貢者再

十四年春正月己酉北京河南山東饑免永樂十二年
逋租發粟一百三十七萬石有奇振之辛酉都督金玉
討山西廣靈山寇平之三月癸巳都督梁福鎮湖廣貴
州壬寅阿魯台敗瓦剌來獻捷壬申禮部尚書呂震請
封禪帝曰今天下雖無事四方多水旱疾疫安敢自謂
太平且六經無封禪之文事不師古甚無謂也不聽夏
四月乙亥胡廣為文淵閣大學士六月丁卯都督同知

蔡福等備倭山東秋七月丁酉遣使捕北京河南山東
州縣蝗壬寅河決開封乙巳錦衣衛指揮使紀綱有罪
伏誅八月癸酉旦壽星見禮臣請上表賀不許丁亥作
北京西宮九月癸卯京師地震戊申發北京冬十月丁
丑次鳳陽祀皇陵癸未至自北京謁孝陵十一月壬寅
詔文武羣臣集議營建北京丙午召張輔還戊申漢王
高煦有罪削二護衛徙山東山西湖廣流民於保安州
賜復三年十二月丁卯鄭和復使西洋是年占城古里

爪哇滿刺加蘇門答刺南巫里渤泥彭亨錫蘭山溜山
南渤利阿丹麻林忽魯謨斯柯枝入貢琉球中山入貢
者再

十五年春正月丁酉大祀天池於南郊壬子平江伯陳
瑄督漕運木赴北京二月癸亥谷王穗有罪廢為庶人
丁卯豐城侯李彬鎮交趾壬申泰寧侯陳珪董建北京
柳升王通副之三月丁亥交趾始貢士至京師丙申雜
犯死罪以下囚輸作北京贖罪丙午漢王高煦有罪徙

封樂安州壬子北巡發京師皇太子監國夏四月己巳
次邾城申禁軍士毋踐民田稼有傷者除今年租或先
被水旱逋租亦除之癸未西宮成五月丙戌至北京六
月丁酉李彬討交趾賊黎核斬之己亥中官張謙使西
洋還敗倭寇於金鄉衛秋八月甲午甌寧人進金丹帝
曰此妖人也令自餌之毀其方書九月丁卯曲阜孔子
廟成帝親製文勒石冬十月李彬敗交趾賊楊進江斬
之十一月癸酉禮部尚書趙軾為兵部尚書巡視塞北

屯戍軍民利弊是年西洋蘇祿東西洋王來朝琉球中山別失八里琉球山南真臘淳泥占城暹羅哈烈撒馬兒罕入貢

十六年春正月甲寅交趾黎利反都督朱廣擊敗之甲戌倭陷松門衛按察司僉事石魯坐誅興安伯徐亨都督夏貴備開平二月辛丑交趾四忙縣賊殺知縣歐陽智以叛李彬遣將擊走之三月甲寅賜李騏等進士及第出身有差都督僉事劉鑑備邊大同夏五月庚戌重

修太祖實錄成丁巳胡廣卒秋七月己巳敕責陝西諸司比聞所屬歲屢不登致民流莩有司坐視不恤又不以聞其咎安在其速發倉儲振之贊善梁潛司諫周冕以輔導皇太子有闕皆下獄死冬十二月戊子諭法司朕屢敕中外官潔已愛民而不肖官吏恣肆自若百姓苦之夫良農必去稂莠者為害苗也繼今犯賊必論如法辛丑成山侯王通馳傳振陝西饑是年暹羅占城爪哇蘇門答刺泥八刺滿刺加南勃利哈烈沙哈魯千里

達撒馬兒罕入貢琉球中山入貢者再

十七年春二月乙酉興安伯徐亨備興和開平大同夏
五月丙午都督方政敗黎利於可藍柵六月壬午免順
天府去年水災田租戊子劉江殲倭寇於望海埭封江
廣寧伯秋七月庚申鄭和還八月中官馬騏驎交趾又
安土知府潘僚反九月丙辰慶雲見禮臣請表賀不許
冬十二月庚辰諭法司曰刑者聖人所慎匹夫匹婦不
得其死足傷天地之和召水旱之災甚非朕寬恤之意

自今在外諸司死罪咸送京師審錄三覆奏然後行刑
乙未工部侍郎劉仲廉覈實交趾戶口田賦察軍民利
病是年哈密土魯番失刺思亦思弗罕真臘占城哈烈
阿魯南渤利蘇門答刺八答黑商滿刺加入貢琉球中
山入貢者四

十八年春正月癸卯李彬及都指揮孫霖徐諤敗黎利
於嘉江閏月丙子翰林院學士楊士榮金幼孜為文淵閣
大學士庚辰擢人材布衣馬麟等十三人為布政使叅

政叅議二月己酉蒲臺妖婦唐賽兒作亂安遠侯柳升
帥師討之三月辛巳敗賊於卸石柵寨都指揮劉忠戰
沒賽兒逸去甲申山東都指揮僉事衛青敗賊於安邱
指揮王真敗賊於諸城獻俘京師戊子山東布政使諸
挺張海按察使劉本等坐縱盜誅戊戌以逗留徵柳升
下吏尋釋之夏五月壬辰左都督朱榮鎮遼東庚寅交
趾叅政侯保馮貴禦賊戰死六月丙午北京地震秋七
月丁亥徐亨備開平八月丁酉朔日有食之九月己巳

召皇太子丁亥詔自明年改京師為南京北京為京師
冬十月庚申李彬遣指揮使方政敗黎利於老搨十一
月戊辰以遷都北京詔天下是月振青萊饑十二月己
未皇太子及皇太孫至北京癸亥北京郊廟宮殿成是
年始設東廠命中官刺事古麻剌朗王來朝暹羅占城
爪哇滿剌加蘇門答剌蘇祿西王入貢

十九年春正月甲子朔奉安五廟神主於太廟御奉天
殿受朝賀大宴甲戌大祀天地於南郊戊寅大赦天下

癸巳鄭和復使西洋二月辛丑都督僉事胡原帥師巡海捕倭三月辛巳賜曾鶴齡等進士及第出身有差夏四月庚子奉天華蓋謹身三殿災詔羣臣直陳闕失乙巳詔罷不便於民及不急諸務蠲十七年以前逋賦免去年被災田糧已酉萬壽節以三殿災止賀癸丑蹇義等二十六人巡行天下安撫軍民五月乙丑出建言給事中柯暹御史何忠鄭維桓羅通等為知州庚寅令交趾屯田秋七月己巳帝將北征敕都督朱榮領前鋒安

遠侯柳升領中軍寧陽侯陳懋領御前精騎永順伯薛
斌恭順伯吳克忠領馬隊武安侯鄭亨陽武侯薛祿領
左右哨英國公張輔成山侯王通領左右掖八月辛卯
朔日有食之冬十一月辛酉分遣中官楊實御史戴誠
等覈天下庫藏出納之數丙子議北征軍餉下戶部尚
書夏原吉刑部尚書吳中於獄兵部尚書方賓自殺辛
巳下侍讀李時勉於獄甲申發直隸山西河南山東及
南畿應天等五府滁和徐三州丁壯運糧期明年二月

至宣府是年瓦剌賢義王太平安樂王把禿孛羅來朝
忽魯謨斯阿丹祖法兒刺撒不刺哇木骨都來古里柯
枝加異勒錫蘭山溜山南勃利蘇門答刺阿魯滿刺加
甘巴里蘇錄榜葛刺淳泥古麻刺朗王入貢暹羅入貢
者再

二十年春正月己未朔日有食之免朝賀詔羣臣修省
辛未大祀天地於南郊壬申豐城侯李彬卒於交趾二
月乙巳隆平侯張信兵部尚書李慶分督北征軍餉役

民夫二十三萬五千有奇運糧三十七萬石三月丙寅
詔有司遇災先振稂聞乙亥阿魯台犯興和都指揮王
喚戰死丁丑親征阿魯台皇太子監國戊寅發京師辛
巳次雞鳴山阿魯台遁夏四月乙卯次雲州大開五月
乙丑獵於偏嶺丁卯大開辛未次西涼亭壬申大開乙
酉次開平六月壬辰令軍行出應昌結方陣以進癸巳
謀報阿魯台兵攻萬全諸將請分兵還擊帝曰詐也彼
慮大軍搗其巢穴欲以牽制我師敢攻城哉甲午次陽

和谷寇攻萬全者果遁去秋七月己未阿魯台棄輜重
於濶察海側北遁發兵焚之收其牲畜遂旋師謂諸將
曰阿魯台敢悖逆恃兀良哈為羽翼也當還師翦之簡
步騎二萬分五道並進庚午遇於屈裂兒河帝親擊敗
之追奔三十里斬部長數十人辛未徇河西捕斬甚衆
甲戌兀良哈餘黨詣軍門降是月皇太子免南北直隸
山東河南郡縣水災糧芻共六十一萬有奇八月戊戌
諸將分道者俱獻捷辛丑以班師詔天下壬寅鄭亨薛

祿守開平鄭和還九月壬戌至京師癸卯下左春坊大學士楊士奇於獄丙寅下吏部尚書蹇義禮部尚書呂震於獄尋俱釋之辛未錄從征功封左都督朱榮武進伯都督僉事薛貴安順伯冬十月癸巳分遣中官及朝臣十八人覈天下倉糧出納之數十二月辛丑朱榮鎮遼東閏月戊寅乾清宮火是年暹羅蘇門答刺阿丹等國遣使隨貢方物占城琉球中山卜花兒哈密瓦剌土魯番瓜哇入貢

二十一年春正月乙未大祀天地於南郊癸卯交趾叅
將榮昌伯陳智追敗黎利於車來二月己巳都指揮使
鹿榮討柳州叛蠻平之三月庚子御史王愈等會決重
囚誤殺無罪四入坐棄市夏五月癸未免開封南陽衛
輝鳳陽等府去年水災田租己丑常山護衛指揮孟賢
等謀逆伏誅六月庚戌朔日有食之秋七月戊戌復親
征阿魯台安遠侯柳升遂安伯陳英領中軍武安侯鄭
亨保定侯孟瑛領左哨陽武侯薛祿新寧伯譚忠領右

哨英國公張輔安平侯李安領左掖成山侯王通興安
伯徐安領右掖寧陽侯陳懋領前鋒庚子釋李時勉復
其官辛丑皇太子監國壬寅發京師戊申次宣府敕居
庸關守將止諸司進奉八月己酉大閱庚申塞黑峪長
安嶺諸邊險要丁丑皇太子免兩京山東郡縣水災田
租九月戊子次西陽河癸巳聞阿魯台為瓦剌所敗部
落潰散遂駐師不進冬十月甲寅次上莊堡迤北王子
也先土干帥所部來降封忠勇王賜姓名金忠庚午班

師十一月甲申至京師是年錫蘭山王來朝又遣使入貢占城古里忽魯謨斯阿丹祖法兒刺撒不刺哇木骨都東柯枝加異勒溜山南渤利蘇門答刺阿魯滿刺加失刺思榜葛刺琉球中山入貢

二十二年春正月甲申阿魯台犯大同開平詔羣臣議北征敕邊將整兵俟命丙戌徵山西山東河南陝西遼東五都司及西寧鞏昌洮岷各衛兵期三月會北京及宣府戊子大祀天地於南郊癸巳鄭和復使西洋三月

戊寅大閱諭諸將親征命柳升陳英領中軍張輔朱勇
領左掖王通徐亨領右掖鄭亨孟瑛領左哨薛祿譚忠
領右哨陳懋金忠領前鋒己卯賜邢寬等進士及第出
身有差夏四月戊申皇太子監國己酉發京師庚午次
隰寧諜報阿魯台走答蘭納木兒河遂趨進師五月己
卯次開平使使招諭阿魯台諸部己酉座道中遺骸丁
酉宴羣臣於應昌命中官歌太祖御製詞五章曰此先
帝所以戒後嗣也雖在軍旅何敢忘己亥次威遠州復

宴羣臣自製詞五章命中官歌之皇太子令免廣平順
德揚州及湖廣河南郡縣水災田租六月庚申前鋒去
答蘭納木兒河不見敵命張輔等窮搜山谷三百里無
所得進駐河上癸亥陳懋等引兵抵白中山以糧盡還
甲子班師命鄭亨等以步卒西會於開平壬申夜南京
地震秋七月庚辰勒石於清水源之崖戊子遣呂震以
旋師諭太子詔告天下己丑次蒼崖戌不豫庚寅至榆
木川大漸遺詔傳位皇太子喪禮一如高皇帝遺制辛

卯崩年六十有五太監馬雲密與大學士楊榮金幼孜
謀以六軍在外祕不發喪鎔錫為梨以斂載以龍輦所
至朝夕上饔如常儀壬辰楊榮偕御馬監少監海壽馳
訃皇太子壬寅次武平鎮鄭亨步軍來會八月甲辰楊
榮等至京師皇太子即日遣太子奉迎於開平己酉次
鵬鶚谷皇太孫至軍中發喪壬子及郊皇太子迎入仁
智殿加殮納梓宮九月壬午上尊諡曰體天弘道高明
廣運聖武神功純仁至孝文皇帝廟號太宗葬長陵嘉

靖十七年九月改上尊謚曰啟天弘道高明肇運聖武
神功純仁至孝文皇帝廟號成祖

贊曰文皇少長習兵據幽燕形勝之地乘建文孱弱長
驅內向東有四海即位以後躬行節儉水旱夕告夕振
無有壅蔽知人善任表裏洞達雄武之畧同符高祖六
師屢出漠北塵清至其季年威德遐被四方賓服受朝
命而入貢者殆三十國幅隕之廣遠邁漢唐成功駿烈
卓乎盛矣然而革除之際倒行逆施慙德一局可掩哉

明史卷七

欽定四庫全書薈要卷六千六百一

史部

明史卷八

大學士張廷玉等奉 敕修

本紀第八

仁宗

仁宗敬天體道純誠至德弘文欽武章聖達孝昭皇帝
諱高熾成祖長子也母仁孝文皇后夢冠冕執圭者上
謁寤而生帝幼端重沉静言動有經稍長習射發無不

中好學問從儒臣講論不輟洪武二十八年冊為燕世子嘗命與秦晉周三世子分閱衛士還獨後問之對曰旦寒甚俟朝食而後閱故後又命分閱章奏獨取切軍民利病者白之或文字謬誤不以聞太祖指示之曰兒忽之耶對曰不敢忽顧小過不足瀆天聽又嘗問堯湯時水旱百姓奚恃對曰恃聖人有恤民之政太祖喜曰孫有君人之識矣成祖舉兵世子守北平善拊士卒以萬人拒李景隆五十萬衆城賴以全先是郡王高煦高

燧俱以慧黠有寵於成祖而高煦從軍有功宦寺黃儼等復黨高燧陰謀奪嫡譖世子會朝廷賜世子書為離間世子不啟緘馳上之而儼先潛報成祖曰世子與朝廷通使者至矣無何世子所遣使亦至成祖發書視之乃歎曰幾殺吾子成祖踐阼以北平為北京仍命居守永樂二年二月始召至京立為皇太子成祖數北征命之監國裁決庶政四方水旱饑饉輒遣振恤仁聞大著而高煦高燧與其黨日伺隙讒構或問太子亦知有讒

人乎曰不知也吾知盡子職而已十年北征還以太子遣使後期且書奏失辭悉徵官僚黃淮等下獄十五年高煦以罪徙安樂明年黃儼等復譖太子擅赦罪人官僚多坐死者侍郎胡濙奉命察之密疏太子誠敬孝謹七事以聞成祖意乃釋其後黃儼等謀立高燧事覺伏誅高燧以太子力解得免自是太子始安二十二年七月成祖崩於榆木川八月甲辰遺詔至遣皇太孫迎喪開平丁未出夏原吉等於獄丁巳即皇帝位大赦天下

以明年為洪熙元年罷西洋寶船迤西市馬及雲南交
趾採辦戊午復夏原吉吳中官己未武安侯鄭亨鎮大
同保定侯孟瑛鎮交趾襄城伯李隆鎮山海武進伯朱
榮鎮遼東復設三公三孤官以公侯伯尚書兼之進楊
榮太常寺卿金幼孜戶部侍郎兼大學士如故楊士奇
為禮部左侍郎兼華蓋殿大學士黃淮通政使兼武英
殿大學士俱掌內制楊溥為翰林學士辛酉鎮遠侯顧
興祖充總兵官討廣西叛蠻甲子汰冗官乙丑召漢王

高煦赴京戊辰官吏謫隸軍籍者放還鄉已巳詔文臣

年七十致仕九月癸酉交趾都指揮方政與黎利戰於

茶籠州敗績指揮同知伍雲力戰死丙子召尚書黃福

於交趾庚辰河溢開封免稅糧遣右都御史王彰撫恤

之壬午敕自今官司所用物料於所產地計直市之科

派病民者罪不宥癸未禮部尚書呂震請除服不許乙

酉增諸王歲祿丙戌以風憲官備外任命給事中蕭奇

等三十五人為州縣官丁亥黎利寇清化指揮同知陳

忠戰死戍子始設南京守備以襄城伯李隆為之乙未
散畿內民所養官馬於諸衛所戍成賜吏部尚書蹇義
及楊士奇楊榮金幼孜銀章各一曰繩愆糾繆諭以協
心贊務凡有闕失當言者用印密封以聞冬十月壬寅
罷市民間金銀革兩京戶部行用庫癸卯詔天下都司
衛所修治城池戊申通政使請以四方雨澤章奏送給
事中收貯帝曰祖宗令天下奏雨澤欲知水旱以施恤
民之政積之通政司既失之矣今又令收貯是欲上之

人終不知也自今奏至即以聞己酉冊妃張氏為皇后
壬子立長子瞻基為皇太子封子瞻浚為鄭王瞻墉越
王瞻塏襄王瞻垺荆王瞻塏淮王瞻埶滕王瞻珩梁王
瞻埏衛王乙卯詔中外官舉賢才嚴舉主連坐法丁巳
令三法司會大學士府部通政六科於承天門錄囚著
為令丁巳增京官及軍士月廩丁卯擢監生徐永潛等
二十人為給事中十一月壬申朔詔禮部建文諸臣家
屬在教坊司錦衣衛浣衣局及習匠功臣家為奴者悉

宥為民還其田土言事謫戍者亦如之癸酉詔有司條
政令之不便民者以聞凡被災不即請振者罪之阿魯
台來貢馬甲戌詔羣臣言時政闕失乙亥赦兀良哈罪
始命近畿諸衛官軍更番詣京師操練丙子遣御史巡
察邊衛癸未遣衛史分巡天下考察官吏丙戌賜戶部
尚書夏原吉繩愆糾繆銀章己丑禮部奏冬至節請受
賀不許庚寅敕諸將嚴邊備辛卯禁所司擅役屯田軍
士壬辰都督方政同榮昌伯陳智鎮交趾是月諭塞義

楊士奇夏原吉楊榮金幼孜曰前世人主或自尊大惡聞直言臣下相與阿附以至於敗朕與卿等當用為戒又諭士奇曰頃羣臣頗懷忠愛朕有過方自悔而進言者已至良愜朕心十二月癸卯宥建文諸臣外戚全家戍邊者留一人餘悉放還辛亥揭天下三司官姓名於奉天門西序癸丑免被災稅糧庚申葬文皇帝於長陵丙寅鎮遠侯顧興祖破平樂潯州蠻是年于闐琉球占城哈密古麻剌朗滿剌加蘇祿瓦剌入貢

洪熙元年春正月壬申朔御奉天門受朝不舉樂乙亥
敕內外羣臣修舉職業己卯享太廟建弘文閣命儒臣
入直楊溥掌閣事癸未以時雪不降敕羣臣修省丙戌
大祀天地於南郊奉太祖太宗配壬辰朝臣予告歸省
者賜鈔有差著為令己亥布政使周幹按察使胡槩叅
政葉春巡視南畿浙江二月辛丑頒將軍印於諸邊將
戊申祭社稷命太監鄭和守備南京丙辰耕藉田丙寅
太宗神主祔太廟是月南京地震三月壬申前光祿

署丞權謹以孝行擢文華殿大學士丁丑求直言戊子
隆平饑戶部請以官麥貸之帝曰即振之何貸為己丑
詔曰刑者所以禁暴止邪導民於善非務誅殺也吏或
深文傅會以致冤濫朕深憫之自今其悉依律擬罪或
朕過於嫉惡法外用刑法司執奏五奏不允同三公大
臣執奏必允乃已諸司不得鞭囚背及加人官刑有自
官者以不孝論非謀反勿連坐親屬古之盛世採聽民
言用資戒敎令奸人往往撫拾誣為誹謗法吏刻深鰥


鍊成獄刑之不中民則無措其除誹謗禁有告者一切
勿治庚寅陽武侯薛祿為鎮朔大將軍率師巡開平大
同邊辛卯叅將安平伯李安與榮昌伯陳智同鎮交趾
戊戌將還都南京詔北京諸司悉稱行在復北京行部
及行後軍都督府是月南京地震夏四月壬寅帝聞
山東及淮徐民乏食有司徵夏稅方急乃御西角門詔
大學士楊士奇韋詔免今年夏稅及秋糧之半士奇言
上恩至矣但須戶工二部預聞帝曰救民之窮當如救

焚拯溺不可遲疑有司慮國用不足必持不決之意趣
命中官具楮筆令士奇就門樓書詔帝覽畢即用璽付
外行之顧士奇曰今可語部臣矣設北京行都察院壬
子命皇太子謁孝陵遂居守南京戊午如天壽山謁長
陵己未還宮是月振河南及大名饑南京地震五月
己卯侍讀李時勉侍講羅汝敬以言事改御史尋下獄
庚辰帝不豫遣使召皇太子於南京辛巳大漸遺詔傳
位皇太子是日崩於欽安殿年四十有八七月己巳上

尊謚廟號仁宗葬獻陵

贊曰當靖難師起仁宗以世子居守全城濟師其後成
祖乘輿歲出北征東宮監國朝無廢事然中遭媒孽瀕
於危疑者屢矣而終以誠敬獲全善乎其告人曰吾知
盡子職而已不知有讒人也是可為萬世子臣之法矣
在位一載用人行政善不勝書使天假之年涵濡休養
德化之盛豈不與文景比隆哉

明史卷八



總校官編修臣吳紹濬

欽定四庫全書薈要

史部
明史卷九十三

詳校官編修臣汪鏞



欽定四庫全書薈要卷六千六百二 史部

明史卷九

大學士張廷玉等奉 敕修

本紀第九

宣宗

宣宗憲天崇道英明神聖欽文昭武寬仁純孝章皇帝
諱瞻基仁宗長子也母誠孝昭皇后生之前夕成祖夢
太祖授以大圭曰傳之子孫永世其昌既彌月成祖見

之曰兒英氣溢面符吾夢矣此長嗜書智識傑出永樂
七年從幸北京令觀農具及田家衣食作務本訓授之
八年成祖征沙漠命留守北京九年十一月立為皇太
孫始冠自是巡幸征討皆從嘗命學士胡廣等即軍中
為太孫講論經史每語仁宗曰此他日太平天子也仁
宗即位立為皇太子夏四月以南京地屢震命往居守
五月庚辰仁宗不豫璽書召還六月辛丑還至良鄉受
遺詔入宮發喪庚戌即皇帝位大赦天下以明年為宣

德元年辛亥諭邊將嚴守備甲寅趣中官在外採辦者
還罷所市物秋七月乙亥尊皇后為皇太后立妃胡氏
為皇后辛卯鎮遠侯顧興祖討大藤峽蠻平之乙未諭
法司慎刑獄閏月戊申安順伯薛貴清平伯吳誠都督
馬英都指揮梁成帥師巡邊乙丑楊溥入直文淵閣八
月戊辰都指揮李英討安定曲先叛番大敗之安定王
桑兒加失夾詣闕謝罪壬申詔內外羣臣舉廉潔公正
堪牧民者癸未大理卿胡榮叅政葉春巡撫南畿浙江

設巡撫自此始九月壬寅葬昭皇帝於獻陵冬十月戊寅南京地震戊子敕公侯伯五府六部大學士給事中審覈重囚十一月戊戌顧興祖討平思蠻辛酉薛祿為鎮朔大將軍巡邊十二月甲辰顧興祖討平宜山蠻是年哈密回回滿刺撒丁占城琉球中山爪哇烏斯藏瓦剌淳泥入貢

宣德元年春正月癸卯享太廟丁未大祀天地於南郊癸丑赦死罪以下運糧宣府自贖己未遣侍郎黃宗載

十五人清理天下軍伍後遣使著為令二月戊辰祭社
稷丁丑耕藉田丙戌謁長陵獻陵丁亥還宮三月己亥
榮昌伯陳智都督方政討黎利敗績於茶籠州人安知
府琴彭死之癸丑行在禮部侍郎張瑛兼華蓋殿大學
士直文淵閣夏四月乙丑成山侯王通為征夷將軍充
總兵官討黎利尚書陳洽參贊軍務陳智方政奪官從
立功五月甲午朔錄囚丙申詔赦文陞許黎利自新丙
午赦郡縣瘞遺骸庚申召薛祿還秋七月癸巳京師地

震乙未免山東夏稅己亥諭六科凡中官傳旨必覆奏
始行壬子罷湖廣採木八月壬戌漢王高煦反丙寅宥
武臣殊死以下罪復其官己巳親征高煦命鄭王瞻埈
襄王瞻塏居守陽武侯薛祿清平伯吳誠將前鋒大賚
五軍將士辛未發京師辛巳至樂安帝兩遣書諭降又
以敕擊矢射城中諭禍福壬午高煦出降癸未改樂安
曰武定州乙酉班師九月丙申至自武定州錮高煦於
西內戊戌法司鞠高煦同謀者詞連晉王趙王詔勿問

冬十月戊寅釋李時勉復為侍讀十一月乙未成山侯

王通擊黎利於應平敗績尚書陳治死之十二月辛酉

免六師所過秋糧辛未錄囚宥免三千餘人乙酉征南

將軍總兵官黔國公沐晟帥興安伯徐亨新安伯覃忠

征虜副將軍安遠侯柳升帥保定伯梁銘都督崔聚由

雲南廣西分道討黎利兵部尚書李慶參贊軍務是年

爪哇暹羅琉球蘇門答刺滿刺加白葛達撒馬兒罕土

魯番哈密烏斯藏入貢

二年春正月庚子大祀天地於南郊丁未有司奏歲問
因數帝謂百姓輕犯法由於教化未行命申教化二月
癸亥行在戶部侍郎陳山為本部尚書兼謹身殿大學
士直文淵閣乙丑黎利攻交趾城王通擊敗之三月辛
卯賜馬愉等進士及第出身有差夏四月庚申黎利陷
昌江都指揮李任指揮顧福劉順知府劉子輔中官江
智死之甲子晉王濟熿有罪廢為庶人已巳王通許黎
利和五月癸巳薛祿督餉開平己亥仁宗神主祔太廟

丙午錄囚六月戊寅錄囚秋七月己亥黎利陷隘留關

鎮遠侯顧興祖擁兵不救逮治之庚子錄囚辛丑命都

督同知陳懷充總兵官帥師討松潘蠻丁未薛祿敗敵

於開平八月甲子黃淮致仕免兩京山西河南州縣被

災稅糧九月壬辰錄囚乙未柳升師次倒馬坡遇伏戰

死是日保定伯梁銘病卒丙申尚書李慶病卒師大潰

叅將崔聚郎中史安主事陳鏞李宗昉死之冬十月戊

寅王通棄交趾與黎利盟十一月乙酉赦黎利遣侍郎

李琦羅汝敬立陳暲為安南國王悉召文武吏士還已
亥以皇長子生大赦天下免明年稅糧三之一十二月
丁丑振陝西饑并給絹布十五萬疋是年爪哇占城暹
羅琉球瓦剌哈密亦力把里撒馬兒罕入貢

三年春正月甲午大祀天地於南郊丙申陳懷平松潘
蠻二月戊午立皇長子祁鎮為皇太子是月作帝訓成
三月癸未廢皇后胡氏立貴妃孫氏為皇后壬辰錄囚
夏四月癸亥赦凡官民建言章疏尚書都御史給事中

會議以聞勿諱閏月壬寅錄囚免山西旱災稅糧甲辰
命有司振卹庚戌論棄交趾罪王通等及布政使弋謙
中官山壽馬騏下獄論死籍其家鎮遠侯顧興祖并下
獄五月壬子李琦羅汝敬還黎利表陳曷卒子孫并絕
乞守國侯命辛酉錄囚己巳復遣羅汝敬等諭黎利立
陳氏後辛未贈交趾死事諸臣壬申免北京被災夏稅
六月丙戌免陝西被災夏稅丁未都御史劉觀巡視河
道秋七月戊辰錄囚八月辛卯罷北京行部及行後軍

都督府丁未帝自將巡邊九月辛亥次石門驛兀良哈
寇會州帝帥精卒三千人往擊之乙卯出喜峰口擊寇
於寬河帝親射其前鋒殪三人兩翼軍竝發大破之寇
望見黃龍旂下馬羅拜請降皆生縛之斬渠酋甲子班
師癸酉至自喜峰口冬十一月癸酉錦衣指揮鍾法保
請採珠東莞帝曰是欲擾民以求利也下之獄十二月
庚子廣西總兵官山雲討擒忻城蠻是年占城暹羅爪
哇琉球瓦剌哈密安南曲先土魯番亦力把里撒馬兒

罕入貢

四年春正月兩京地震己未大祀天地於南郊二月己丑南京獻駒虞二禮部請表賀不許三月甲戌遣李琦再諭黎利訪立陳氏後夏四月辛巳山震討平柳潯蠻戊子工部尚書黃福平江伯陳瑄經畧漕運五月壬子錄囚六月甲午罷文吏犯贓贖罪例己亥寇犯開平鎮撫張信等戰死庚子薛祿督餉開平秋七月己未幸文淵閣八月己卯起復楊溥九月癸亥釋顧興祖於獄冬

十月庚辰幸文淵閣癸未以天寒諭法司錄囚丙戌製
猗蘭操賜廷臣諭以薦賢為國之道庚寅張瑛陳山罷
甲午閱武於近郊乙未獵於峪口戊戌還宮十一月癸
卯薛祿及恭順侯吳克忠帥師巡宣府十二月乙亥京
師地震壬辰罷中官松花江造船是年爪哇占城琉球
榜葛刺哈密土魯番亦力把里撒馬兒罕入貢

五年春正月癸丑大祀天地於南郊戊辰尚書夏原吉
卒二月壬辰罷工部採木癸巳頒寬卹之令省災傷寬

馬政免逋欠薪芻招流民賜復一年罷採買減宮田舊
科十之三卹工匠禁司倉官包納戒法司慎刑獄乙未
奉皇太后謁陵三月戊申道見耕者下馬問農事取耒
三推顧侍臣曰朕三推已不勝勞況吾民終歲勤動乎
命賜所過農民鈔已酉還宮辛亥李琦還黎利稱陳氏
無後上表請封丙辰免山西去歲被災田租丁巳賜林
震等進士及第出身有差夏四月戊寅薛祿帥師築赤
城鵬鶚雲州獨石圍山城堡五月癸卯追奪賊吏誥敕

著為令丙辰修預備倉出官錢收糴備荒癸亥擢郎中
況鍾何文淵九人為知府賜敕遣之六月己卯遣官捕
近畿蝗諭戶部曰往年捕蝗之使害民不減於蝗宜知
此弊因作捕蝗詩示之秋七月癸亥甄別守令八月己
巳朔日食陰雨不見禮官請表賀不許九月丙午擢御
史于謙長史周忱六人為侍郎巡撫兩京山東山西河
南江西浙江湖廣己卯巡近郊己未還宮冬十月乙亥
阿魯台犯遼東遼海衛指揮同知皇甫斌力戰死丙子

巡近郊己卯獵於望道丙戌至洗馬林遍閱城堡兵備
壬辰還宮十二月癸巳曲先叛番平閏月己未敕內外
諸司久淹獄囚者罪之是年占城琉球爪哇瓦剌哈密
罕東土魯番撒馬兒罕亦力把里人貢

六年春正月丁丑大祀天地於南郊庚辰大雨雷電二
月丁酉侍郎羅汝敬督陝西屯田己亥濬金龍口引河
達徐州以便漕三月乙亥命吏部考察外官自布政按
察二司始著為令夏四月己酉侍郎柴車經理山西屯

田六月己亥遣使詔黎利權署安南國事秋七月己巳
錄囚壬午許朶顏三衛市易冬十月甲午陳懷平松潘
蠻十一月丙子始命官軍兌運民糧乙酉分遣御史往
逮貪暴中官素琦等十二月乙未素琦等十一人棄市
榜其罪示天下丁未金幼孜卒庚戌遣御史巡視寧夏
甘州屯田水利是年占城琉球瓦剌哈密蘇門答剌亦
力把里八貢

七年春正月辛酉朔日有食之凡朝賀癸酉大祀天地

於南郊二月甲子以春和諭法司錄囚三月庚申下詔
行寬卹之政辛酉諭禮部曰朕以官田賦重十減其三
乃聞異時蠲租詔下戶部皆不行甚者戒約有司不得
以詔書為辭是廢格詔令便澤不下究也自今令在必
行毋有所遏夏四月辛丑免山西逋賦壬寅募商中鹽
輸粟八邊六月癸卯錄囚癸丑罷中官入番市馬是月
作官箴成凡三十五篇示百官秋八月乙未敕京官三
品以上舉才行文學之士吏部都察院黜方面有司不

職者九月庚午諸將巡邊是秋免兩畿及嘉興湖州水災稅糧十一月辛酉召督漕平江伯陳瑄侍郎趙新等歲終至京議糧賦利弊是年占城琉球哈密瓦剌亦力把里入貢

八年春正月丁卯大祀天地於南郊二月壬子錄囚宥免五千餘人三月丙辰賜曹鼐等進士及第出身有差庚辰諭內外優卹軍士違者風憲官察奏罪之是春以兩京河南山東山西久旱遣使振卹夏四月戊戌詔蠲

京省被災逋租雜課免今年夏稅賜復一年理冤獄減
殊死以下赦軍匠在逃者罪有司各舉賢良方正一人
巡按御史按察使糾貪酷吏及使臣生事者五月丁巳
總兵官都督蕭授討平貴州烏羅蠻丁卯山雲討平宜
山蠻六月乙酉禱雨不應作閔旱詩示羣臣辛丑詔中
外疏決罪囚是夏復振兩京河南山東山西湖廣饑免
稅糧秋七月壬申免江西水災稅糧八月癸巳汰京師
冗官閏月辛亥西域貢麒麟戊午景星見禮官請表賀

皆不許九月乙酉遣官錄天下重囚己亥阿魯台部咎
卜寇涼州總兵官劉廣擊斬之冬十二月乙亥諭法司
宥京官過犯是年暹羅占城琉球安南滿刺加天方蘇
門答刺古里柯枝阿丹錫蘭山佐法兒甘巴里加異勒
忽魯謨斯哈密瓦刺撒馬兒罕亦力把里入貢

九年春正月辛卯大祀天地於南郊二月庚戌振鳳陽
淮安揚州徐州饑乙卯申兩京山東山西河南寬卹之
令三月戊寅山雲討平思恩叛蠻夏四月己未黎利死

子麟來告喪命麟權署安南國事戊辰錄囚五月壬午
瘞暴骸秋七月甲申遣給事中御史錦衣衛官督捕兩
畿山東山西河南蝗八月庚戌振湖廣饑甲子赦兩京
湖廣江西河南巡撫巡按御史三司官行視災傷蠲秋
糧十之四乙丑罷工部採辦己巳瓦剌脫歡攻殺阿魯
台來告捷九月癸未自將巡邊乙酉度居庸關丙戌獵
於至道乙未阿魯台子阿卜只俺來歸丁酉至洗馬林
關城堡兵備己亥大獵冬十月丙午還宮丙辰都督方

政討平松潘叛蠻甲子罷陝西市馬丁卯兩畿浙江湖
廣江西饑以應運南京及臨清倉粟振濟十一月戊戌
停刑庚子免四川被災稅糧十二月甲子帝不豫衛王
瞻埏攝享太廟是年暹羅占城琉球蘇門答刺哈密瓦
刺入貢

十年春正月癸酉朔不視朝命羣臣謁皇太子於文華
殿甲戌大漸罷採罷營造諸使乙亥崩於乾清宮年三
十有八遺詔國家重務白皇太子丁酉上尊諡廟號宣

宗葬景陵

贊曰仁宗為太子失愛於成祖其危而復安太孫蓋有力焉即位以後吏稱其職政得其平綱紀修明倉庾充羨閭閻樂業歲不能災蓋明興至是歷年六十民氣漸舒蒸然有治平之象矣若乃強藩猝起旋即削平掃蕩邊塵猝寇震懾帝之英姿睿畧庶幾克繩祖武者歟

明史卷九

欽定四庫全書舊要卷六千六百三 史部

明史卷十

大學士張廷玉等奉 敕修

本紀第十

英宗前紀

英宗法天立道仁明誠敬昭文憲武至德廣孝睿皇帝
諱祁鎮宣宗長子也母貴妃孫氏生四月立為皇太子
遂冊貴妃為皇后宣德十年春正月宣宗崩壬午即皇

帝位遵遺詔大事白皇太后行大赦天下以明年為正
統元年始罷午朝丁亥尚書蹇義卒辛丑戶部尚書黃
福叅贊南京守備機務二月戊申尊皇太后為太皇太
后庚戌尊皇后為皇太后辛亥封弟祁鈺為郕王甲寅
罷諸司冗費三月戊寅放教坊司樂工三千八百餘人
辛巳罷山陵夫役萬七千人丙申諭三法司死罪臨決
三覆奏然後加刑夏四月壬戌以元學士吳澄從祀孔
子廟庭丁卯以久旱考察布按二司及府州縣官戊辰

遣給事中御史捕畿南山東河南淮安蝗五月壬午戶部言浙江蘓松荒田稅糧減除二百七十七萬餘石請加覆覈帝以覈實必增額為民患不許六月丁未令天下瘞暴骸辛酉葬章皇帝於景陵秋七月丙子免山西夏稅之半八月丙午減光祿寺膳夫四千七百餘人九月壬辰詔督漕總兵及諸巡撫官歲以八月至京會廷臣議事是月王振掌司禮監冬十月壬寅遣使諭阿勒台多爾濟巴勒辛亥詔天下衛所皆立學十一月戊辰

朔日有食之十二月壬子阿勒台多爾濟巴勒犯涼州
鎮番總兵官陳懋敗之於黑山是年琉球中山暹羅日
本占城安南滿刺加哈密衛拉特入貢

正統元年春正月丙戌罷銅仁金場庚寅發禁軍三萬
人屯田畿輔三月己巳賜周旋等進士及第出身有差
乙亥御經筵夏四月丁酉朔享太廟五月丁卯阿勒台
多爾濟巴勒寇肅州壬辰設提督學校官秋八月甲戌
右都督蔣貴充總兵官都督同知趙安副之帥師討阿

勒台多爾濟巴勒九月癸卯遣侍郎何文淵王佐副都御史朱與言督兩淮長蘆浙江鹽課欽差巡鹽自此始庚申封黎利子麟為安南國王冬十一月乙卯詔京官三品以上舉堪任御史者四品及侍從言官舉堪任知縣者各一人免湖廣被災稅糧十二月丁丑以邊議稽緩下兵部尚書王驥侍郎鄭埜於獄尋釋之乙酉湖廣貴州總兵官蕭授討廣西蒙顧十六洞賊平之是年琉球中山瓜哇安南烏斯藏占城衛拉特入貢遣宣德時

來貢古里蘓門答刺十一國使臣還國

二年春正月甲午宣宗神主祔太廟己亥大同總兵官
方政都指揮楊洪會寧夏甘肅兵出塞討阿勒台多爾
濟巴勒三月甲午錄囚戊午御史金敬撫輯大名及河
南陝西逃民夏四月免河南被災田糧五月庚寅兵部
尚書王驥經理甘肅邊務壬寅刑部尚書魏源經理大
同邊務丁未免陝西平涼六府旱災夏稅六月乙亥以
宋胡安國蔡沈真德秀從祀孔子廟庭庚辰副都御史

賈諒侍郎鄭辰振河南江北饑冬十月甲子鎮守甘肅
左副總兵任禮充總兵官都督蔣貴都督同知趙安為
左右副總兵兵部侍郎柴車僉都御史曹翼羅亨信參
贊軍務討阿勒台多爾濟巴勒兵部尚書王驥太監王
貴監督之十一月乙巳振河南饑免稅糧是年琉球中
山賽瑪爾堪暹羅土魯番衛拉特哈密入貢

三年春三月巳亥京師地震辛丑振陝西饑夏四月乙
卯王驥任禮蔣貴趙安襲擊阿勒台多爾濟巴勒大破

之追至黑泉還癸未立大同馬市六月癸酉以旱減中
外疑獄乙亥都督方政僉事張榮同征南將軍黔國公
沐晟右都督沐昂討麓川叛蠻思任發秋七月癸未下
禮部尚書胡濙於獄辛卯下戶部尚書劉中敷於獄尋
俱釋之八月乙亥以陝西饑令雜犯死囚以下輸銀贖
罪送邊吏易米九月癸巳蠲兩畿湖廣逋賦冬十月癸
丑再振陝西饑十二月丙辰下刑部尚書魏源右都御
史陳智等於獄是年榜葛剌貢麒麟中外表賀琉球中

山邏羅占城衛拉特入貢

四年春正月壬午方政破麓川蠻於大寨追至空泥敗
沒二月丁巳總兵官蕭授平貴州計砂叛苗閏月辛丑
釋魏源陳智等復其官并宥棄交趾王通馬騏罪三月
己酉詔赦天下壬子賜施盤等進士及第出身有差庚
申廢遼王貴烺為庶人丁卯黔國公沐晟卒於軍癸酉
增南京及在外文武官軍俸廩夏五月庚戌右都督沐
昂為征南將軍充總兵官討思任發丁卯錄中外囚六

月乙未京師地震丁酉以京畿水災祭告天地諭羣臣
修省戊戌下詔寬卹求直言秋七月庚戌免兩畿山東
江西河南被災稅糧壬申汰冗官八月戊戌增設沿海
備倭官己亥京師地震冬十二月丁丑都督同知李安
充總兵官僉都御史王翱叅贊軍務討松潘祈命簇叛
番是年琉球占城安南衛拉特榜葛刺滿刺加哈密入
貢

五年春正月己未大祀天地於南郊二月乙亥侍講學

士馬愉侍講曹鼐入閣預機務甲申僉都御史張純大
理寺少卿李畛振撫畿內流民三月戊申建北京宮殿
夏四月壬申免山西逋賦丙戌祈命簇番降五月征麓
川叅將張榮敗績於芒市六月丁丑免兩畿被災田糧
戊寅錄囚秋七月辛丑遣刑部侍郎何文淵等分行天
下修備荒之政壬寅楊榮卒八月乙未令各邊修舉荒
政九月壬寅蠲雲南逋賦冬十一月壬寅振浙江饑壬
子免蘓松常鎮嘉湖水災稅糧丁巳廣西僧楊行祥偽

稱建文帝械送京師錮錦衣衛獄死乙丑沐昂討平師
宗叛蠻十二月壬午免南畿浙江山東河南被災稅糧
是年占城琉球中山哈密烏斯藏入貢

六年春正月己亥朔日當食不見禮官請表賀不許庚
戌大祀天地於南郊乙卯以莊浪地屢震躬祀郊廟遣
使祭西方嶽鎮大舉征麓川定西伯蔣貴為平蠻將軍
都督同知李安僉事劉聚副之兵部尚書王驥總督軍
務三月庚子下兵部侍郎于謙於獄夏四月甲午以災

異遣使省天下疑獄五月甲寅刑部侍郎何文淵大理
卿王文錄在京刑獄巡撫侍郎周忱刑科給事中郭瑾
錄南京刑獄釋南京為大理少卿秋七月丁未振浙江
湖廣饑冬十月丁丑戶部尚書劉中敷侍郎吳璽陳瑞
荷校於長安門旬餘釋還職庚寅免畿內被災稅糧十
一月甲午朔乾清坤寧二宮奉天華蓋謹身三殿成大
赦定都北京文武諸司不稱行在癸卯王驥拔麓川上
江寨癸丑免河南山東及鳳陽等府被災稅糧閏月甲

成復下劉中敷吳璽陳瑞於獄踰年釋中敷為民璽瑞
成邊十二月王驥克麓川思任發走孟養丁未班師左
副總兵李安攻餘賊於高黎貢山敗績是年占城衛拉
特哈密入貢

七年春正月甲戌大祀天地於南郊二月庚申如天壽
山三月甲子還宮乙亥免陝西屯糧十之五戊寅賜劉
儼等進士及第出身有差夏四月甲午振陝西饑是月
免山西河南山東被災稅糧五月壬申論平麓川功進

封蔣貴為侯王驥靖遠伯戊寅立皇后錢氏丁亥倭陷
大嵩所六月壬子戶部侍郎焦宏備倭浙江秋七月丙
寅振陝西饑民贖民所鬻子女八月壬寅復命王驥總
督雲南軍務九月甲戌陝西進嘉禾禮臣請表賀不許
冬十月壬辰烏梁海犯廣寧乙巳太皇太后崩十二月
葬誠孝昭皇后於獻陵是年占城衛拉特哈密琉球中
山安南瓜哇土魯番烏斯藏入貢

八年春正月丁卯大祀天地於南郊二月己丑汰南京

冗官戊戌淮王瞻垧來朝丙午荆王瞻垧來朝夏五月
己巳復命平蠻將軍蔣貴王驥帥師征麓川思任發子
思機發戊寅雷震奉天殿鴟吻敕修省壬午大赦六月
丁亥侍講劉球陳十事下錦衣衛獄太監王振使指揮
馬順殺之甲辰下大理少卿薛瑄於獄秋七月戊午祭
酒李時勉荷校於國子監門三月九日甲子思機發請
降冬十一月宣宗廢后胡氏卒十二月癸未免山東復
業民稅糧二年丙戌駙馬都尉焦敬荷校於長安右門

是年占城安南衛拉特哈密瓜哇入貢

九年春正月甲寅右都御史王文巡延安寧夏邊辛酉
大祀天地於南郊辛未成國公朱勇興安伯徐安都督
馬亮陳懷同太監僧保曹吉祥劉永祥但住分道討烏
梁海二月丙午王驥擊走思機發俘其孥以獻召驥還
三月辛亥朔新建太學成釋奠於先師孔子甲子朱勇
等師還楊士奇卒乙丑叙征烏梁海功封侯懷平鄉伯
馬亮招遠伯成國公朱勇等進秩有差夏四月丙戌翰

林學士陳循直文淵閣預機務丁亥振沙州及赤斤蒙
古饑五月己未命法司錄在京刑獄刑部侍郎馬昂錄
南京刑獄六月壬午振湖廣貴州蠻饑秋七月己酉下
駙馬都尉石璟於獄處州賊葉宗留盜福安銀礦殺福
建參議竺淵癸丑免河南被災稅糧閏月戊寅復開福
建浙江銀場甲申瘞暴骸壬寅雷震奉先殿鵠吻八月
庚戌免陝西被災稅糧贖民所鬻子女甲戌敕邊將備
衛拉特額森九月丁亥靖遠伯王驥右都御史陳鎰經

理西北邊備冬十月丙午朔日有食之庚午烏梁海貢馬謝罪是年兩畿山東河南浙江湖廣大水江河皆溢暹羅琉球中山衛拉特安南烏斯藏滿刺加入貢

十年春正月丙戌大祀天地於南郊戊子詔舉智勇之士二月丁巳京師地震已未免陝西逋賦丙寅烏梁海貢馬請貸犯邊者罪不許壬申如天壽山三月丙子還宮庚辰思機發入貢謝罪庚寅賜商輅等進士及第出身有差夏四月甲辰朔日有食之庚申詔所在有司飼

逃民復業及流移就食者六月乙丑振陝西饑免田租

三之二秋七月乙未減糶河南懷慶倉粟濟山陝饑八

月癸丑免湖廣旱災秋糧丙辰免蘓松嘉湖十四府州

水災秋糧冬十月戊辰侍讀學士苗衷為兵部侍郎侍

講學士高穀為工部侍郎並入閣預機務十二月丙辰

緬甸獲思任發斬其首送京師壬辰輸河南粟振陝西

饑廣西總兵官安遠侯柳溥討平慶遠叛蠻是年琉球

中山哈密伊蘭巴里安南占城滿刺加錫蘭山賽瑪爾

堪烏斯藏入貢

十一年春正月己卯大祀天地於南郊庚辰予太監王振等弟姪世襲錦衣衛官二月辛酉異氣見華蓋奉天殿遣官祭告天地癸亥詔恤刑獄三月戊辰下戶部尚書王佐刑部尚書金濂右都御史陳鎰等于錦衣衛獄尋釋之壬申御史柳華督福建浙江江西兵討礦賊癸酉如天壽山庚辰還宮夏六月丙辰京師地震秋七月癸酉增市廛稅鈔庚辰楊溥卒八月戊戌免湖廣被災

秋糧庚申下吏部尚書王直等於獄尋釋之九月辛丑
廣西徭叛執化州知州茅自得殺千戶汪義冬十月甲
寅遣給事中御史分賚諸邊軍士十一月壬申減殊死
以下罪是年琉球中山暹羅安南瓜哇回回哈密占城
伊蘭巴里賽瑪爾堪烏斯藏入貢

十二年春正月癸酉大祀天地於南郊三月癸亥如天
壽山庚午還宮丙子免杭嘉湖被災秋糧夏四月丁巳
免蘇松常鎮被災秋糧五月己亥大理少卿張驥振濟

寧及淮揚饑秋七月甲辰敕各邊練軍備衛拉特八月
庚申朔日有食之九月乙未馬愉卒是年琉球中山安
南占城衛拉特瓜哇哈密暹羅入貢

十三年春正月丁酉大祀天地於南郊三月戊子詔責
孟養宣慰司獻思機發壬寅賜彭時等進士及第出身
有差王驥仍總督軍務都督同知宮聚為平蠻將軍充
總兵官帥師討思機發夏四月免浙江江西湖廣被災
秋糧五月丙戌遣使捕山東蝗甲辰刑部侍郎丁鉉撫

輯河南山東災民秋七月乙酉河決大名沒三百餘里
遣使蠲振已酉河決河南沒曹濮東昌潰壽張沙灣壞
運道工部侍郎王永和治之八月乙卯福建賊鄧茂七
作亂甲戌命御史丁瑄捕之冬十一月丙戌寧陽侯陳
懋克總兵官保定伯梁瑤平江伯陳豫副之太監曹吉
祥王瑾提督火器刑部尚書金濂叅贊軍務討鄧茂七
甲辰處州賊流劫金華諸縣庚戌永康侯徐安脩倭山
東十二月庚午廣東徭賊作亂是年琉球中山安南占

城入貢衛拉特貢使三千人賞不如例遂構釁

十四年春正月甲午大祀天地於南郊乙巳免浙江福建銀課二月丁巳御史丁瑄指揮劉福擊斬鄧茂七於延平己巳王驥破思機發於金沙江又破之鬼哭山班師辛未指揮僉事徐恭充總兵官討處州賊葉宗留工部尚書石璞叅贊軍務三月戊子如天壽山癸巳還宮夏四月庚戌處州賊犯崇安殺都指揮吳剛壬戌湖廣貴州苗賊大起命王驥討之乙丑遣御史十三人同中

官督福建浙江銀課五月丙戌陳懋擊破沙縣賊壬辰
旱太監金英同法司錄囚己亥侍讀學士張益直文淵
閣預機務庚子巡按福建御史汪澄棄市并殺前巡按
御史柴文顯六月庚戌靖州苗犯辰溪都指揮高亮戰
死丙辰南京謹身諸殿災甲子修省詔河南山西班軍
番休者盡赴大同宣府乙丑西寧侯宋瑛總督大同兵
馬己巳赦天下戊寅平鄉伯陳懷駙馬都尉井源都督
王貴吳克勤太監林壽分練京軍於大同宣府備衛拉

特秋七月己丑瓦剌也先寇大同叅將吳浩戰死下詔
親征吏部尚書王直帥羣臣諫不聽癸巳命郕王居守
是日西寧侯宋瑛武進伯朱冕與衛拉特戰於陽和敗
沒甲午發京師乙未次龍虎臺軍中夜驚丁酉次居庸
關辛丑次宣府羣臣屢請駐蹕不許丙午次陽和八月
戊申次大同鎮守太監郭敬諫議旋師己酉廣寧伯劉
安為總兵官鎮大同庚戌師還丁巳次宣府庚申瓦剌
兵大至恭順侯吳克忠都督吳克勤戰沒成國公朱勇

永順伯薛綬救之至鷄兒嶺遇伏全軍盡覆辛酉次土木被圍壬戌師潰死者數十萬英國公張輔泰寧侯陳瀛駙馬都尉井源平鄉伯陳懷襄城伯李珍遂安伯陳塤修武伯沈榮都督梁成王貴尚書王佐鄺埜學士曹鼐張益侍郎丁鉉王永和副都御史鄧縉等皆死帝北狩甲子京師聞敗羣臣聚哭於朝侍講徐珵請南遷兵部侍郎于謙不可乙丑皇太后命郕王監國戊辰帝至大同己巳皇太后命立皇子見深為皇太子辛未帝至

威寧海子甲戌至黑河九月癸未邸王即位遙尊帝為
太上皇帝

明史卷十

欽定四庫全書薈要卷六千六百四 史部

明史卷十一

大學士張廷玉等奉 敕修

本紀第十一

景帝

恭仁康定景皇帝諱祁鈺宣宗次子也母賢妃吳氏英宗卽位封郕王正統十四年秋八月英宗北狩皇太后命王監國丙寅移通州糧入京師徵西畿山東河南備

倭運糧諸軍入衛召寧陽侯陳懋帥師還戊辰兵部侍郎于謙為本部尚書令羣臣直言時事舉人材己巳皇太后詔立皇子見深為皇太子卹陣亡將士庚午籍王振家辛未右都御史陳鎰撫安畿內軍民壬申都督石亨總京營兵乙亥諭邊將衛拉特奉駕至不得輕出輸南京軍器於京師修撰商輅彭時入閣預機務是月廣東賊黃蕭養作亂九月癸未王卽皇帝位遙尊皇帝為太上皇帝以明年為景泰元年大赦天下免景泰二年

田祖十之三甲申夷王振族庚寅處州賊平癸巳指揮
僉事季鐸奉皇太后命達於上皇甲午祭宣府土木陣
亡將士瘞遺骸乙未總兵官安鄉伯張安討廣州賊敗
死指揮僉事王清被執死之辛丑給事中孫祥郎中羅
通為右副都御史守紫荆居庸關甲辰遣御史十五人
募兵畿內山東山西河南都督同知陳友帥師討湖廣
貴州叛苗乙巳遣使奉書上皇丙午苗圍平越衛調雲
南四川兵會王驥討之叅議楊信民為右僉都御史討

廣東賊冬十月戊申也先擁上皇至大同壬子詔諸王勤王乙卯于謙提督諸營石亨及諸將分守九門丙辰也先陷紫荊關孫祥死之京師戒嚴丁巳詔宣府遼東總兵官山東河南山西陝西巡撫及募兵御史將兵入援戊午也先薄都城都督高禮毛福壽敗之於彰義門己未右通政王復太常少卿王榮使額森營朝上皇於土城庚申徵兵於朝鮮調河州諸衛土軍入衛于謙石亨等連敗額森衆於城下壬戌寇退甲子出紫荊關丁

卯詔止諸王兵衛拉特可汗托克托布哈使來辛未昌
平伯楊洪充總兵官都督孫鏜范廣副之勦畿內餘寇
十一月癸未修沿邊關隘辛卯毛福壽為副總兵討辰
州叛苗壬辰上皇至衛拉特乙未侍郎耿九疇撫安南
畿流民賜復三年十二月庚戌尊皇太后為上聖皇太
后辛亥王驥為平蠻將軍充總兵官討貴州叛苗都督
同知董興為左副總兵討廣東賊戶部侍郎孟鑑參贊
軍務癸丑尊母賢妃為皇太后甲寅立妃汪氏為皇后

丙辰大赦己未石亨楊洪柳溥分練京營兵戊辰祭陣
亡官軍於西直門外是年琉球中山占城烏斯藏賽瑪
爾堪入貢景泰元年春正月丁丑朔罷朝賀辛巳城昌
平壬午享太廟丙戌大祀天地於南郊閏月甲寅衛拉
特寇寧夏癸亥詔會試取士母拘額庚午大同總兵官
郭登敗衛拉特於沙窩又追敗之於楞栳山封登定襄
伯是月免大名真定開封衛輝被災稅糧二月戊寅耕
藉田癸未懸賞格招陷敵軍民丙戌石亨為鎮朔大將

軍帥師巡大同都指揮同知楊能充遊擊將軍巡宣府
壬辰太監喜寧伏誅三月己酉衛拉特寇朔州辛亥錄
土木死事諸臣後癸丑衛拉特寇寧夏慶陽乙卯寇朔
州癸亥免畿內逋賦及夏稅夏四月丙子廣東都指揮
李昇何貴帥兵捕海賊戰死辛巳衛拉特寇大同官軍
擊却之丁亥保定伯梁珪代王驥討貴州叛苗戊子大
理寺寺丞李茂錄囚南京考黜百司訪軍民利病丙申
衛拉特寇雁門己亥都督同知劉安充總兵官練兵於

保定真定及涿易通三州僉都御史曹泰叅贊軍務庚子振山東饑辛丑振畿內被寇州縣癸卯衛拉特寇大同郭登擊却之五月乙巳免山西被災稅糧衛拉特掠河曲代州遂南犯詔劉安督涿易諸軍禦之戊申衛拉特寇雁門益黃花鎮戍兵衛陵寢癸丑董興擊破廣東賊黃蕭養伏誅壬戌振大同被寇軍民丙寅侍郎侯璉副總兵田禮大破貴州苗辛未衛拉特遣使請和六月壬午衛拉特寇大同郭登擊却之丙戌也先復擁上皇

至大同丁亥左都御史陳鑑王文以鞫太監金英家人
不實下獄尋釋之戊子衛拉特寇宣府都督朱謙叅將
紀廣禦却之戊戌免山東被災州縣稅糧己亥給事中
李實大理寺丞羅綺使衛拉特秋七月庚戌尚書侯璉
叅將方瑛破貴州苗擒其酋獻京師庚申右都御史楊
善工部侍郎趙榮使衛拉特停山西民運糧大同癸亥
李實羅綺還己巳楊善至衛拉特額森許上皇歸八月
癸酉上皇發衛拉特戊寅祀社稷甲申遣侍讀商輅迎

上皇於居庸關丙戌上皇還京師帝迎於東安門入居

南宮帝帥百官朝謁庚寅赦天下辛卯刑部右侍郎江

淵兼翰林學士直文淵閣預機務九月癸丑巡撫河南

副都御史王來總督湖廣貴州軍務討叛苗冬十月辛

卯錄囚癸巳免畿內逋賦十一月辛亥禮部尚書胡濙

請令百官賀上皇萬壽節十二月丙申復請明年正旦

百官朝上皇於延安門皆不許是年朝鮮貢馬者三

二年春正月庚戌大祀天地於南郊壬子詔天下朝覲

官當黜者運糧口外二月辛未釋奠於先師孔子辛卯
以星變修省詔廷臣條議寬卹諸政癸巳詔畿內及山
東巡撫官舉廉能吏專司勸農授民荒田貸牛種三月
壬寅賜柯潛等進士及第出身有差夏四月乙酉梁珪
王來等破平越苗獻俘京師甲午衛拉特寇宣府馬營
敕遊擊將軍石彪等巡邊乙未命石亨選京營兵操練
尚書石璞總督軍務五月乙未城固原六月戊辰朔日
當食不見己卯詔貴州各衛修舉屯田秋七月戊申普

定永寧畢節諸苗復叛梁珪等留軍討之八月壬申南京地震辛巳復午朝九月乙卯禁諸司起復冬十月己丑免山西被災稅糧十二月庚寅禮部左侍郎王一寧祭酒蕭滋兼翰林學士直文淵閣預機務是月額森弒其主托克托布哈是年安南琉球中山衛拉特哈密入貢

三年春正月丙午大祀天地於南郊二月乙酉副都御史劉廣衡錄南京囚戌子戶部尚書金濂以違詔下獄

尋釋之三月戊午毛福壽討湖廣巴馬苗克之夏五月
甲午廢皇太子見深為沂王立皇子見濟為皇太子廢
皇后汪氏立太子母杭氏為皇后封上皇子見清榮王
見淳許王大赦天下丙申築沙灣堤成辛丑河南流民
復業者計口給食五年乙巳官顏孟二氏子孫各一人
六月乙亥罷各省巡撫官入京議事是月大雨河決沙
灣秋七月乙未左都御史王翱總督兩廣軍務壬寅王
一寧卒八月乙丑振徐兗水災戊辰都御史洪英尚書

孫原貞薛希璉等分行天下考察官吏丁丑振兩畿水
災州縣免稅糧乙酉振南畿河南山東流民九月庚寅
江淵起復辛卯以南京地震兩淮大水河決命都御史
王文巡視安輯乙未振兩畿山東山西福建廣西江西
遼東被災州縣閏月癸未開處州銀場是月福建盜起
冬十月戊戌左都御史王文兼翰林學士直文淵閣預
機務丙辰都督孫鏜僉事石彪協守大同都督同知衛
頴僉事楊能張欽協守宣府備額森十一月己未朔日

有食之戊辰都督方瑛平白石崖諾苗甲戌安輯畿內
山東山西逃民復賦役五年是月免山東及淮徐水災
稅糧十二月癸巳始立團營太監阮讓都督楊俊等分
統之聽于謙石亨太監劉永誠曹吉祥節制是月免河
南及永平被災秋糧是年衛拉特琉球中山瓜哇暹羅
安南哈密烏斯藏入貢

四年春正月辛未大祀天地於南郊二月戊子五開清
浪諸苗復叛梁珪王來討之庚戌免去年江西被災秋

糧三月戊寅開建寧銀場夏四月戊子築沙灣決口運

南京倉粟振徐州五月丁巳發徐淮倉振饑民己巳王

文起復甲戌徐州復大水民益饑發支運及鹽課糧振

之丁丑發淮安倉振鳳陽乙酉沙灣河復決六月壬辰

吏部尚書何文淵以給事中林聰言下獄尋令致仕辛

亥瘞土木大同紫荆關暴骸秋七月庚辰停諸不急工

役八月己丑振河南饑甲午額森自立為可汗冬十月

庚寅詔天下鎮守巡撫官督課農桑甲午諭德徐有貞

為左僉都御史治沙灣決河戊戌額森遣使來十一月
辛未皇太子見濟薨十二月乙未免山東被災稅糧乙
巳齊邊軍是年琉球中山安南瓜哇日本占城哈密衛
拉特入貢

五年春正月戊午黃河清自龍門至於芮城甲子大祀
天地於南郊壬申罷福州建寧銀場甲戌平江侯陳豫
學士江淵撫輯山東河南被災軍民二月乙巳以雨暘
弗時詔修省求直言三月壬子賜孫賢等進士及第出

身有差辛酉學士江淵振淮北饑民王文撫卹南畿甲

子總督兩廣副都御史馬昂破瀧水徭庚辰緬甸執獻

思機發夏四月壬午朔日有食之辛卯方瑛破草塘苗

封瑛南和伯五月甲子禮部郎中章綸御史鍾同以請

復沂王為皇太子下錦衣衛獄六月戊子錄囚秋七月

癸酉振南畿水災八月丁酉復命天下巡撫官赴京師

議事九月壬戌免蘓松常揚杭嘉湖漕糧二百餘萬石

冬十月庚辰副都御史劉廣衡巡撫浙江福建專司討

賊十一月戊午罷蘓松常鎮織造採辦十二月免南畿
浙江被災稅糧是年安南琉球中山瓜哇入貢額森為
知院阿剌所殺

六年春正月戊午大祀天地於南郊二月壬午太監王
誠同法司刑科錄囚大理少卿李茂等錄南京浙江囚
夏四月丙子朔日有食之辛巳敕戶兵二部及兩畿山
東河南浙江湖廣撫按三司官條寬卹事罷不急諸務
五月己巳禱雨於南郊六月乙亥宋儒朱熹裔孫挺為

翰林院世襲五經博士癸未河決開封秋七月乙亥沙
灣決口隄成庚寅以南京災異屢見敕羣臣修省八月
庚申南京大理少卿廖莊以請復沂王為皇太子杖於
闕下并杖章綸鍾同於獄同卒九月乙亥振蘓松饑民
米麥一百餘萬石冬十月戊午免陝西被災稅糧十一
月乙亥南和伯方瑛為平蠻將軍充總兵官討湖廣苗
十二月己巳免南畿被災秋糧是年琉球中山暹羅哈
密滿刺加入貢

七年春正月己卯尚書石璞撫安湖廣軍民壬午大祀
天地於南郊二月庚申皇后崩甲子營壽陵三月戊寅
免雲南被災稅糧夏五月戊寅以水旱災異敕內外諸臣
修省辛卯宋儒周敦頤裔孫冕為翰林院世襲五經博
士六月庚申葬肅孝皇后冬十月癸卯振江西饑十二
月己亥方瑛大破湖廣苗戊午振畿內山東河南水災
癸亥帝不豫罷明年元旦朝賀是冬免畿內山東被災
稅糧並蠲逋賦是年琉球中山賽瑪爾堪烏斯藏入貢

八年春正月戊辰免江西被災稅糧丁丑帝興疾宿南郊齋宮己卯羣臣請建太子不聽壬午武清侯石亨副都御史徐有貞等迎上皇復位二月乙未廢帝為郕王遷西內皇太后吳氏以下悉仍舊號癸丑王薨於西宮年三十謚曰戾毀所營壽陵以親王禮葬西山給武成中衛軍二百戶守護成化十一年十二月戊子制曰朕叔郕王踐阼戡難保邦奠安宗社殆將八載彌留之際奸臣貪功忘興讒構請削帝號先帝旋知其枉每用悔

恨以次抵諸奸於法不幸上賓未及舉正朕敦念親親
用成先志可仍皇帝之號其議謚以聞遂上尊謚敕有
司繕陵寢祭饗視諸陵

贊曰景帝當倥偬之時奉命居攝旋正大位以繫人心
事之權而得其正者也篤任賢能勵精政治強寇深入
而宗社乂安再造之績良云偉矣而乃汲汲易儲南內
深錮朝謁不許恩誼愀然終於興疾齊宮小人乘間竊
發事起倉猝不克以令名終惜夫

明史卷十一

欽定四庫全書薈要卷六千六百五

史部

明史卷十二

大學士張廷玉等奉 敕修

本紀第十二

英宗後紀

天順元年春正月壬午昧爽武清侯石亨都督張輓張
輓左都御史楊善副都御史徐有貞太監曹吉祥以兵
迎帝於南宮御奉天門朝百官徐有貞以原官兼翰林

學士入閣預機務日中御奉天殿即位下兵部尚書于
謙太學士王文錦衣衛獄太常寺卿許彬大理寺卿薛
瑄為禮部侍郎兼翰林學士入閣預機務丙午詔赦天
下改景泰八年為天順元年論奪門迎復功封石亨忠
國公張軫太平侯張軫文安伯楊善興濟伯曹吉祥嗣
子欽都督同知丁亥殺于謙王文籍其家陳循江淵俞
士悅謫戍蕭鎡商輅除名己丑復論奪門功封孫鏜懷
寧伯董興海寧伯欽天監正湯序禮部右侍郎官舍旂

軍晉級者凡三千餘人辛卯罷巡撫提督官壬辰榜于
謫黨人示天下甲午殺昌平侯楊俊二月乙未朔廢景
泰帝為邲王庚子高穀致仕湯序請除景泰年號不許
癸卯吏部侍郎李賢兼翰林學士入閣預機務殺都督
范廣戊申柳溥破廣西蠻癸丑邲王薨戊午方瑛石璞
大破湖廣苗召璞還壬戌免南畿被災秋糧三月己巳
復立長子見深為皇太子封皇子見潁為德王見澍秀
王見澤崇王見浚吉王癸酉封徐有貞武功伯乙亥大

賚文武軍民庚辰賜黎淳等進士及第出身有差石亨
為征虜副將軍勦寇延綏丁亥振山東饑夏四月甲午
朔以災異數見求直言乙未免浙江被災稅糧丁酉方
瑛攻銅鼓藕洞苗悉平之丁未錄囚癸丑罷團營乙卯
字來寇寧夏叅將种興戰死五月辛未安遠侯柳溥備
宣大邊是月以石亨言下御史楊瑄張鵬獄六月甲午
下右都御史耿九疇副都御史羅綺錦衣衛獄己亥下
徐有貞李賢錦衣衛獄是日大風雨雹壞奉天門鳴吻

敕修省庚子徐有貞李賢羅綺耿九疇謫外任楊瑄張
鵬成邊通政司叅議兼侍講呂原入閣預機務壬寅薛
瑄致仕癸卯修撰岳正入閣預機務甲辰復李賢為吏
部侍郎乙巳巡撫貴州副都御史蔣琳坐于上謙棄市
秋七月乙丑復下徐有貞於獄丙寅承天門災丁卯躬
禱於南郊戊辰敕修省庚午李賢復入閣改許彬南京
禮部侍郎辛未出岳正為欽州同知尋下獄謫戊癸酉
大赦癸未放徐有貞於金齒辛卯大賚諸邊軍士八月

甲午以彗星屢見躬禱於上帝九月甲子太常少卿彭
時兼翰林學士入閣預機務冬十月丁酉賜王振祭葬
立祠曰旌忠壬寅徵江西處士吳興弼丙辰釋建文帝
幼子文圭及其家屬安置鳳陽十一月甲戌廣西總兵
官朱瑛討田州叛蠻己丑免山東被災夏稅十二月壬
辰封曹欽昭武伯辛丑安遠侯柳溥充總兵官禦宇來
於甘涼是年琉球中山安南暹羅占城哈密烏斯藏入
貢

二年春正月辛酉兵部尚書陳汝言有罪下獄乙丑享

太廟甲戌大祀天地於南郊己卯上皇太后尊號二月

戊申開雲南福建浙江銀場中官市雲南珍寶閏月己

卯瘞土木暴骸夏四月復設巡撫官五月壬寅授處士

吳與弼左諭德辭不拜尋送還鄉秋七月癸卯定遠伯

石彪為平夷將軍充總兵官禦寇寧夏八月戊辰李來

寇鎮番冬十月甲子獵南海子壬午武平伯陳友為征

夷將軍充總兵官勦寇寧夏十一月甲寅免山東秋糧

是年安南烏斯歲占城哈密入貢

三年春正月乙未大祀天地於南郊甲辰定遠伯石彪彰武伯楊信敗孛來於安邊營都督僉事周賢都指揮李鑑戰死進彪為侯二月丁卯遣御史及中官採珠廣東夏四月壬子巡撫兩廣僉都御史葉盛破龍水獠已巳南和侯方瑛克貴州苗六月辛酉復命巡撫官以八月集京師議事秋八月庚戌石彪有罪下錦衣衛獄已未禁文武大臣給事中御史錦衣衛官往來交通違者

依鐵榜例論罪乙亥免湖廣被災秋糧冬十月己未幸
南海子庚午石亨以罪罷諸奪門冒功者許自首改正
是月命法司會廷臣每歲霜降錄囚後以為常十一月
癸己振湖廣饑是年哈密琉球中山錫蘭山滿刺加入
貢

四年春正月丁亥大祀天地於南郊癸卯石亨有罪下
獄尋死二月壬子獐陷梧州丁卯石彪棄市三月庚辰
賜王一夔等進士及第出身有差戊戌免南畿被災秋

糧夏四月己酉分遣內臣督浙江雲南福建四川銀課
壬子襄王瞻塏來朝五月壬午免畿內浙江被災秋糧
己亥罷中官督蘇杭織造六月癸亥免湖廣被災稅糧
秋七月乙亥朔日有食之辛卯自五月雨至是月淮水
決沒軍民田廬遣使振恤八月甲子孛來三道入寇大
同總兵官李文宣府總兵官楊能禦之癸酉孛來入鴈
門掠忻代朔諸州九月庚辰孛來圍大同右衛庚寅撫
寧伯朱永都督白玉鮑政備宣府邊甲午免江西被災

秋糧冬十月甲子閱京營將領騎射於西苑戊辰幸南海子十一月丁酉閱隨操武臣騎射於西苑閏月己未幸鄭村壩閱甲仗軍馬是年琉球中山安南占城爪哇哈密烏斯藏入貢

五年春正月庚戌大祀天地於南郊二月乙卯免山東被災稅糧丙申都督僉事顏彪為征夷將軍充總兵官討兩廣猺賊三月壬子免蘇松常鎮被災稅糧甲寅湖廣貴州總兵官李震會廣西軍勦猺獞悉破之夏四月

癸巳兵部侍郎白圭督陝西諸邊討孛來五月丁未免
河南被災秋糧六月丙子孛來寇河西官軍敗績壬午
兵部尚書馬昂總督軍務懷寧伯孫鏜充總兵官帥京
營軍禦之秋七月庚子總督京營太監曹吉祥及昭武
伯曹欽反左都御史寇深恭順侯吳瑾被殺懷寧伯孫
鏜帥兵討平之癸卯磔吉祥於市夷其族其黨湯序等
悉伏誅丁未免南畿被災稅糧庚戌大赦求直言丁巳
河決開封侍郎薛遠往治之戊午都督馮宗充總兵官

禦寇於河西兵部侍郎白圭副都御史王竑叅贊軍務
辛酉孛來上書乞和九月壬戌京師地震有聲冬十月
壬申以西邊用兵令河南山西陝西士民納馬者予寇
幣十一月丁酉朔日有食之壬戌幸南海子是年安南
琉球中山哈密伊蘭巴里入貢

六年春正月丁未大祀天地於南郊戊申孛來遣使入
貢二月癸酉諭孛來三月癸丑召馮宗等還夏四月壬
申免河南被災秋糧五月庚子顏彪討平兩廣諸徭已

未免陝西被災秋糧六月戊辰淮王祁銓來朝秋七月
淮安海溢九月乙未皇太子崩冬十一月甲午葬孝恭
章皇后是年琉球中山哈密烏斯藏暹羅入貢

七年春正月丙午大祀天地於南郊二月壬戌詹事陳
文為禮部侍郎兼翰林學士入閣預機務三月壬寅旱
詔行寬卹之政停各處銀場夏四月壬午建宣大巡按
御史李蕃荷校於長安門外死丙戌復遣中官督蘇杭
織造五月己丑朔日有食之甲寅遼東巡撫御史楊璉

以擅撻軍職逮治六月丁卯逮山西巡撫御史韓祺荷
校於長安門數日死秋七月庚戌免陝西被災稅糧閏
月甲戌上宣宗廢后胡氏尊號戊寅命湖廣貴州會師
討洪江叛苗九月甲戌敕廣東總兵官歐信會廣西兵
討猺賊冬十月丁酉振西安諸府饑丁未巡撫廣西僉
都御史吳楨節制兩廣諸軍討猺賊十一月癸酉賊陷
梧州致仕布政使宗欽死之壬午下右都御史李賓副
都御史林聰於錦衣衛獄十二月辛卯下刑部尚書陸

瑜侍郎周瑄程信於錦衣衛獄尋釋之是年琉球中山
哈密安南烏斯藏入貢

八年春正月乙卯帝不豫己未皇太子攝事於文華殿
己巳大漸遺詔罷宮妃殉葬庚午崩年三十有八三月
乙未上尊謚廟號英宗葬裕陵

贊曰英宗承仁宣之業海內富庶朝野清晏大臣如三
楊胡濙張輔皆累朝勲舊受遺輔政綱紀未弛獨以王
振擅權開釁遂至乘輿播遷乃復辟而後猶追念不已

抑何其惑溺之深也前後在位二十四年無甚裨政至
於上恭讓后謚釋建庶人之繫罷宮妃殉葬則盛德之
事可法後世者矣

明史卷十二